

光緒江西通志

江西通志卷一百二十七

宦績錄二 統轄

明

趙德勝濠人爲元義兵長善馬槩太祖取滁陽德勝母在軍中乃與朱文正棄其妻來從太祖喜賜之名爲帳前先鋒擢後翼統軍元帥克九江瑞昌臨江吉安還下安慶進克撫州取新淦討南昌叛將復其城授僉江南行樞密院事與朱文正鄧愈共守南昌破陳友諒將於西山復臨江吉安撫州未幾友諒大舉圍南昌德勝率所部數千背城逆戰射殺其將敵大沮明日復合環城數匝友諒親督眾來攻城且壞德勝殊死抵禦且戰且築城壞復完暮坐城門樓指揮士卒中弩矢卒年三十

九追封梁國公諡武桓列祀功臣廟

明史

鄧愈虹人初名友德太祖賜今名年甫十六每戰先登陷陣軍中咸服其勇累遷僉行樞密院事遣使說降饒州守將于光遂移守饒饒濱彭蠡湖與陳友諒接境數來侵輒擊卻之進江南行省參政總制各翼軍馬取浮梁徇樂平餘干建昌皆下友諒撫州守將鄧克明爲吳宏所攻遣使僞降以緩師愈知其情卷甲夜馳二百里比明入其城克明出不意單騎走遂定撫州克明不得已降會友諒丞相胡廷瑞獻龍興路以愈爲江西行省參政守之而命降將祝宗康泰以所部從二人旋叛據城愈倉卒奪撫州門以出奔還應天太祖弗之罪也旣而徐達還師復洪都復命愈佐大都督朱文正鎮之其

明年友諒眾六十萬入寇樓船高與城等乘漲直抵城下圍數百重愈分守撫州門當要衝友諒親督眾來攻城壞且三十餘丈愈且築且戰敵攻益急晝夜不解甲者三月太祖自將來援圍始解論功與克敵等太祖己平武昌使愈帥兵徇江西未附州縣鄧克明之弟志清據永豐有卒二萬愈擊破之禽其大帥五十餘人從常遇春平沙坑麻嶺諸寨進兵取吉安圍贛州五月乃克之進江西行省右丞時年二十八兵興諸將早貴未有如愈與李文忠者愈爲人簡重慎密不憚危苦將軍嚴善撫降附其徇安福也部卒有虜掠者判官潘樞入謁面責之愈驚起謝趣下令掠民者斬索軍中子女盡出之樞因閉置空舍中自坐舍外作糜食之卒有謀乘夜

劫取者愈鞭之以徇樞悉護遺還其家民大悅後封衛

國公洪武十年卒追贈甯河王諡武順

明史

薛顯蕭人初爲趙均用將以泗州來降授親軍指揮從征伐南昌平命顯從大都督朱文正守之陳友諒寇南昌顯守章江新城二門友諒攻甚急顯隨方禦之閒出銳卒搏戰斬其平章劉進昭禽副樞趙祥固守三月乃解武昌旣平鄧仲謙據新淦不下顯討斬之因徇下未附諸郡縣以功擢江西行省參政

明史

黃彬湖廣江夏人初從徐壽輝將歐普祥守袁州勸普祥遣使納款擊敗陳友諒眾友諒勢大促遂棄江州彬之力也太祖至龍興令普祥仍守袁州而以彬爲江西行省參政未幾普祥死彬領其眾普祥故殘暴彬盡反

其所爲民甚安之從常遇春征贛州饒鼎臣據吉安爲
熊天瑞聲援遇春兵至鼎臣走安福彬以兵躡之鼎臣
走茶陵天瑞乃降永新守將周安叛彬從湯和執安鼎
臣亦殪移鎮袁州招集諸山寨江西悉定洪武三年封
宜春侯四年贛州上猶山寇叛討平之二十三年坐胡
惟庸黨死

明史

陶安字主敬當塗人元至正初舉江浙鄉試授明道書
院山長避亂家居太祖取太平安率父老出迎太祖召
與語善之留參幕府初命知黃州坐事謫知桐城移知
饒州陳友定兵攻城安督吏民固守援兵至敗去諸將
欲盡戮民之從寇者安不可太祖賜詩褒美州民建生
祠祀之洪武元年四月江西行省參政闕帝以命安論

之曰江西上游地撫綏莫如卿安辭帝不許至任政績

益著其年九月卒於官追封姑孰郡公

明史

丁豫字叔寬浙江海鹽人洪武初以儒術開聘入京太

祖召見問天下治否對曰盜賊已息但恐復生今日之

治願以安民爲本稱旨授江西按察使

海鹽文獻志作按察司僉事

詳刑慎法澤被於民民頌之不衰

舊志

韓宜可字伯時浙江山陰人元至正中行御史臺辟爲

掾不就洪武初薦授山陰教諭擢監察御史彈劾不避

權貴九年出爲江西按察司僉事時官吏有罪者皆以

上悉謫屯鳳陽毋慮萬數宜可疏爭之帝是其言後坐

事將刑御謹身殿親鞠之天晴無雲忽雷火繞殿中帝

驚曰得毋枉是人邪遂獲免復疏陳二十餘事皆報可

官至左副都御史

明史白志

解敏河南陽武人洪武十八年進士任江西按察使剛

毅明敏政聲著聞超擢右都御史

明一統志嘉靖林志

李思聰字仲謀湖廣桂陽人洪武二十三年進士爲江

西布政司參議至卽肇創貢院興起學校且以廉介自

將書翰亦重於世

萬應南昌府志

房安字子靜河南汝陽人洪武中由國子生授北平按

察僉事遷江西按察使以爲守自勵旌善懲惡咸服吏

民之志聲與赫然官至工部右侍郎

明一統志嘉靖林志

李希明字潛文浙江東陽人任江西左參政時陳友諒

餘黨依險縱掠朝廷將出師勦之希明奏乞先招撫不

服興師未晚從之流民爭先來歸卒以安業

據金華先民傳補

周觀政浙江山陰人洪武中薦授九江教授擢監察御

史出爲江西按察司僉事遷按察使振肅風紀吏民畏

之

明史韓宜可傳 明一統志 自志 謹案明一統志作周觀今從明史及舊志

劉辰字伯靜浙江金華人謁太祖婺州署典籤永樂初預修太祖實錄遷江西布政司左參政奏蠲九郡荒田糧歲饑勸富民貸饑者蠲其徭役以爲之息官爲立券期年而償居官廉勤尙氣與都司按察使不相得數爭坐免官起刑部右侍郎致仕卒

明史

何穎湖廣武陵人建文二年進士爲江西按察僉事永樂七年九月妖賊李法良行彌勒教流入湘潭聚眾爲亂事聞遣豐城侯李彬發兵勦之法良遁至吉水縣縣民執以獻械送京師伏誅時有司捕法良黨多所株引

穎悉爲辨別無濫及者人咸德之

豫章書

顧佐字禮卿河南太康人建文二年進士永樂中由御史遷江西按察副使剛直不撓吏民畏服及召爲應天尹人比之包孝肅云

白志

邵玘字以先浙江蘭谿人永樂四年進士授御史巡按江西政尙威嚴所過人不敢犯升江西按察使南昌新建二縣附省夙苦上官和買里役多至傾家玘視事立罷之訟牒積年填委悉取省閔躬聽其鉅者而以餘歸郡縣滯獄一清官至南京左副都御史

萬曆南昌府志

柴車字叔輿浙江錢塘人永樂二年以舉人授兵部武選司員外郎八年從帝北征還遷江西右參議嘗以採木入閩經廣信廣信守故人也餽蜜一罍發視之乃白

金笑曰公不知故人矣卻不受其介特如此

明史

林瑜字子潤福建龍巖人永樂中任江西按察僉事行部贛州豪民某索逋殺人賄誣姪殺伯母獄已具瑜鞫得實寘豪民於法安福有劇盜未獲奸民誣富家匿之瑜廉得真盜富家獲釋升本司副使袁州接壤長沙流民爲寇瑜奉檄往治殲其渠魁餘黨悉撫定嘗督造戰衣一百萬責以三月如期而集居江西二十餘年去之

日百姓爭遮留之

嘉靖林志

顧巽字與權浙江慈谿人永樂十年進士文皇帝親選方面授巽江西按察僉事公廉仁恕民隱無不上聞大理卿夏時正稱之曰俸無十金之積可方古之廉吏

舊志

蔣忠南直隸懷遠人父原永平衛百戶忠襲職升本衛

千戶以靖難功遷江西都司都指揮同知先是守將多貪墨縱士卒爲盜民恆以爲苦忠至申明軍律取無賴者繩以法民遂得安永樂十一年卒於官

保章書

陳憲字廷章浙江定海人永樂十六年進士以御史巡按江西莊重知憲體南昌府屬舊苦三司供億憲悉革去之民以爲便吉安所千戶臧清橫甚都司受賕庇之他官莫敢詰憲廉得清殺一家無罪三人狀執訊辭伏械至京師正法時稱爲名御史

萬歷南昌府志

史克新永樂中任江西按察副使剛方正直發奸摘伏如神巡歷所部淹滯無遺卒於官聞者流涕

明一統志

張翼陝西秦安人永樂中鄉舉以監察御史巡按江西會歲大侵孳殍相屬於道翼繪圖上請發帑金數十萬

振之全活甚眾沿江地多斥鹵可田有司憚於開墾翼

爲處給牛種鑿渠開道灌田萬餘頃民以殷富

陝西通志

賈諒字子信山東嶧縣人永樂中由鄉舉入太學選侍

皇太孫說書擢給事中宣德中拜右副都御史巡視江

西按治豪強不少假諒內行修當官有風采士類稱之

明史顧佐傳

趙新字日新浙江富陽人永樂初由國子生授工部主

事擢吏部郎中晉吏部右侍郎巡撫江西綜核吏治使

百司無廢事又以漕淮之舟運江西之粟兵農兩利民

甚便之官至吏部尙書

安志

陳智字孟機湖廣咸甯人永樂四年進士授御史歷江

西左右布政使廉能剛果值永豐曾子良之亂智捕戮

其渠餘皆散去

嘉靖林志

于謙字廷益浙江錢塘人永樂十九年進士授監察御史宣德初出按江西雪冤囚數百人眾號神明革民所疾苦幾盡超遷兵部右侍郎土木之變有再安社稷功厯官兵部尙書加少保尋爲石亨等所害死之日陰靈四合朝野冤之宏治初贈太傅諡肅愍賜祠萬厯中改

諡忠肅

明史萬厯南昌府志

焦宏字克明河南葉縣人永樂十九年進士除御史升江西按察副使持法平允訟獄一清升右布政使益務寬大九江例輸蘆柴而非其土產民甚困宏奏免之新南昌府學復故濂溪書院拔寒士齒之弟子薦擢下吏之賢者政聲甚著召爲戶部右侍郎

萬厯南昌府志

程富字好禮南直隸歙縣人永樂十二年以春秋中鄉試宣德初授陝西道監察御史巡按廣東會江西歲連侵民多不靖九年秋命富往巡下令悉出倉穀與民活者甚眾大盤山者界樂安永豐新淦三縣間巖巖險巖妖賊曾子良嘯聚饑民數萬人恃以爲固僭號焚掠有司不能制或請招諭以安之富不可檄長河都指揮吳堅領兵往躬率兵壯抵賊境爲援戰之日賊忽以術致霧富陰令術士解之而戒眾蓄銳以待曰霧散賊必來須臾果至自將擊之賊大敗乘勢擣其巢獲男婦二千餘人旣而援兵四集賊益蹙遂盡俘其眾官軍爭欲屠之富曰賊多脅從者槩誅之豈仁義之師哉乃釋平民之係累者不誅一郡安謐民爲之謠曰程豸冠破大盤

逆賊死吾民安敘功升大理寺左少卿時江西苦造紙
鑄錢二局爲奏罷之又奏免梩心杉樟等木二百四十
餘萬以甦民困有十九人搶貓豬法司擬依強盜死罪
富察知其冤曰此左氏所謂牽牛蹊人之田而奪之牛
者釋而辨之及代縫掖之士暨田夫邨稚居販隸卒二
千餘人擁道遮留請立生祠官至左副都御史致仕

安文獻
志補

王鈺字孟堅浙江諸暨人永樂十年一甲三名進士歷
官修撰引疾歸起江西提學僉事鈺風望峻整文學淹
長教人必以身率先大小各有造就考績至京與當道
言不合致仕去

萬厯南
昌府志

夏時字以正浙江錢塘人永樂十六年進士授戶科給

事中宣德初一日三上封事稱旨命署尙寶司兼理吏
禮兵刑四科尋擢江西僉事正統三年奏守令多刻刑
無辜傷和干紀乞命御史按察司官徧閱罪囚釋冤滯
逮按枉法官吏從之遷參議奏恤民六事多議行十二
年超擢廣西左布政使

明史

石璞字仲玉河南臨漳人永樂九年舉於鄉入國學選
授御史正統初歷任江西按察使三年坐逸囚降副使
璞善斷疑獄民娶婦三日歸甯失之婦翁訟壻殺女誣
服論死璞禱於神夢神示以麥字璞曰麥者兩人夾一
人也比明械囚趣行刑囚未出一童子窺門屏開捕入
則道士徒也叱曰爾師令爾偵事乎童子首實果二道
士匿婦槁麥中立捕論如法在江西數年風紀整肅雖

婦豎無不知石憲使者七年遷山西布政累官南京左

都御史

明史

王翱字九皋直隸鹽山人永樂十三年進士改庶吉士英宗卽位廷議遣文武大臣出鎮守翱以右僉都御史偕都督武興鎮江西懲貪抑奸吏民畏愛正統二年召

還院累官至吏部尙書卒贈太保諡忠肅

明史原案明一統

志宣德中翱以都御史鎮守江西剛果孤介敏華就實處事平易而吏民自懼臨下雖寬裕有容而觸奸犯法不少貸刑清政舉一方晏然

陳璘字廷嘉浙江臨海人永樂九年進士以翰林檢討

養疾家居起廣西提學僉事復除江西提學副使教諸生以講學爲務以見諸踐履爲先士皆振奮旋乞休歸

萬曆南

昌府志

楊甯字彥謐南直隸歙人宣德五年進士授刑部主事
機警多才能蔚有時譽正統閒閩浙盜起甯以刑部右
侍郎鎮守江西賊至輒擊敗之暇則詢民疾苦境內嚮
服景泰初召拜禮部尙書後以南京刑部尙書致仕

明史

謹案國子監進士題名碑嘉靖林志安志俱作浙江錢塘人

孫遇字際時山東福山人正統元年進士授戶部主事
累官江西右布政使宅心仁厚愛民如子不爲皎皎之
名而操持凜不可奪嘗罷西山紙廠以甦民累人尤德
之

萬曆南昌府志

張文昌四川江安人由國學生任江西按察使天性慈
厚未嘗妄撻一人輕入一罪吏民服而慕之升廣東左

布政使

萬曆南昌府志

張居傑字翰英浙江上虞人正統鄉舉由吏科給事中累官江西左參政軍屯田賦措理得宜人沐其惠以最

遷山西右布政使

萬應南昌府志

原傑字子英陽城人正統十年進士又二年授御史巡按江西捕誅劇盜奸宄斂迹尋擢江西按察使發甯王奠培淫亂事革其護衛治行聞賜誥旌異遷山東左布政成化閒江西盜起以傑嘗再莅其地得民心詔往治之捕戮六百餘人餘悉解散改左副都御史巡撫鄖陽

明史

白志 謹案萬應南昌府志載傑奏鄉官御史胡鍊守制家居受賄屬託有司解釋人命請械至京鞠罪從之一時貴游爲之斂手云

韓雍字永熙南直隸長洲人正統七年進士授御史負氣果敢以才略稱巡按江西黜貪墨吏五十七人廬陵

泰和盜起捕誅之十三年冬處州賊葉宗留自福建轉
犯江西官軍不利都督僉事陳榮指揮劉眞遇伏死雍
及鎮守侍郎楊甯督軍民協守景泰二年以右僉都御
史代甯巡撫江西首行均徭法編冊輪役一勞九逸又
行歲辦法里甲公貯銀兩有役則估費召戶領解民皆
便之歲饑奏免秋糧劾奏甯王不法事王府官皆得罪
請文天祥謝枋得諡歷官兵部侍郎總督兩廣軍務時
雍年甫三十赫然有才望所規畫措置咸可爲後法卒
年五十七諡襄毅兩廣江右民立祠祀之

明史舊志

周鑑字孔明湖廣麻城人正統十年進士授監察御史
出按江西大學士陳循子所爲不法鑑置之大辟陳切
齒伺以中之無所得已諷部遷雲南副使

湖廣通志

趙敬字叔成一字竹崖南直隸武進人景泰五年進士以御史出按江西上言江西俗健訟官吏稍不假借輒訐害之風憲官用意深刻者張威干譽不惜人才逮繫頗眾刁民自知誣告則潛匿不出案牘久稽請嚴禁報可尋升江西按察使先是故按江西將受代歲凶戶部請敕振濟事已當去士民請留之遂有是命

豫章書

夏壩字宗成浙江天台人景泰二年進士授御史清軍江西發鎮守中官葉達恣橫狀達爲斂威成化中累遷江西左布政使巡撫四川年未五十卽求退杜門不接

賓客

明史 白志 詳案夏壩國子監進士題名碑浙江通志俱作夏壩

呂昌字好隆浙江新昌人正統七年進士授御史累遷江西按察副使中貴某某鎮守橫甚其僕白晝殺入市

中昌捕得論死會淮邸責民子錢甚急昌視其券久入息多者卽焚之葉乃謾語激王王怒奏昌侵侮宗室事下御史按問御史素賢昌抗章訟之事乃白再遷陝西

按察使

據浙江通志補

余複字存美浙江遂安人正統十三年進士授御史升江西按察僉事巡撫韓雍委以均賦役之事剗革夙弊民歡若更生理諸郡漕措置有法晉副使長河峒賊朱紹綱謀叛郡縣騷復督兵贛州討之生擒紹綱等七十餘人賊遂平事聞賜綵幣寶鈔升福建右參政復升江西按察使轉布政使卒於官

舊志

崔恭字克讓直隸廣宗人正統元年進士景泰中官江西左布政使廣濟庫銀爲官吏乾沒者五十萬恭白於

巡撫韓雍典守者咸獲罪定均徭法酌輕重十年一役
遂爲永制民甚便之天順二年甯王奠培與弋陽王奠
燼交構恭會三司覆實得甯王不法狀以上劄其護衛
王稍戢遷右副都御史巡撫蘇松

明史
安志

何宜字行義福建福清人正統十三年進士由職方司
郎中厯江西左布政使澹約若貧士入覲小舟自載隨
從數人而已性謹密閱簿書不遺一字侍吏旁立多欲
僵時王克復爲參政書判如流恆以細屑戒宜宜安之
然俱以政事顯名

萬厯南
昌府志

張綱字大振山東長清人景泰五年進士授監察御史
天順間曹吉祥用事欲庇一指揮以孽奪嫡綱疏奏阻
之人皆重其風節出按江西勘甯王奠培不法劄其護

衛履擢右僉都御史

豫章書

王恕字宗貫陝西三原人正統十三年進士改庶吉士

天順四年自揚州知府超遷江西右布政使平贛州寇

操履剛正人莫敢干以私累官吏部尙書卒諡端毅

明史

萬歷南

昌府志

陳選字士賢浙江臨海人員韜子天順四年會試第一

成進士授御史巡按江西盡黜貪殘吏時人語曰前有

韓雍後有陳選廣寇流入贛州奏聞不待報遣兵平之

憲宗卽位嘗劾尙書馬昂救修撰羅倫等言雖不盡行

一時憚其風采歷廣東左布政使爲市舶中官韋眷誣

奏被逮士民數萬號泣遮留使者辟除乃得出至南昌

病作卒於石亭寺編修張元禎爲治喪斂之宏治初主

事林沂疏選冤詔復其官賜諡忠愍

明史
白志

李齡字景齡廣東潮陽人宣德鄉舉歷御史詹事丞升
江西提學僉事崇雅黜浮裁抑奔競復白鹿洞書院聘
餘干胡居仁主講爲學者師其自持一動一言不苟人
或欺之亦篤信不渝被讒而去時論惜焉

嘉靖林志
萬歷南昌府

志

夏寅字正夫南直隸華亭人正統十三年進士授南京
吏部主事進郎中成化間遷江西副使提督學校其教
務先德行經激勸者多爲聞人嘗語人曰君子有三惜
此生不學一可惜此日閒過二可惜此身一敗三可惜
世傳爲名言後以山東右布政使致仕

明史
白志

翁世資福建莆田人正統七年進士成化初擢江西左

布政使坐事下吏尋得白大軍征兩廣轉江西餉役夫

須十萬人世資議齋直就易嶺南米民得不擾

明史楊鼎傳

林鶚字一鶚浙江太平人景泰二年進士成化初由蘇

州知府超遷江西按察使有犯大辟賄達官求生者鶚

執愈堅廣東寇剽贛州急調兵禦之遁去廣信妖賊妄

稱天神惑眾捕戮其魁立解散厯左右布政使歲饑奏

減民租十五萬石成化六年擢南京刑部右侍郎召爲

刑部右侍郎卒贈尙書諡恭肅

明史

夏時正字季爵浙江仁和人正統十年進士成化六年

以大理寺卿巡視江西災傷除無名稅十餘萬石汰諸

司冗役數萬奏罷不職吏二百餘人增築南昌濱江隄

及豐城諸縣陂岸民賴其利嘗上奏不具齋奏人姓名

吏科論其簡恣帝宥其罪錄彈章示之遂乞休歸僦居民舍布政使張瓚爲築西湖書院居之年近九十而卒

明史

閔珪字朝瑛浙江烏程人天順八年進士授御史出按河南以風力聞成化六年擢江西副使進廣東按察使久之以右僉都御史巡撫江西舉廉黜貪勸振薄賦南贛諸府多盜率強宗家僕珪請獲盜連坐其主仍革豪右橫取之弊法司議從之由是爲貴宦所不悅尹直輩謀之李孜省責珪不能弭盜左遷廣西按察使孝宗時官至刑部尙書正德六年卒諡莊懿

明史
南昌府志
萬曆

楊大榮字崇仁四川酆都人天順元年進士成化初官江西僉事甯縣盜羅萬珪等殺將吏將陷城邑大榮督

甲士勦擒之及其餘黨又擒九江盜舒原一等三十五人南昌有盜匿權貴家弗能得良民受誣者數十人大榮悉出之獄眾謂不然無何盜得眾乃服九江指揮李貴賺百戶田春御史鍛成之春已誣服大榮爲疏於朝春等十七人皆得釋尋爲忌者所譖遂引歸卒年七十有三

據明王鏊震澤集補

徐懷字明德浙江建德人天順四年進士授刑部主事歷江西按察僉事明敏有治才安福豪陳萬年恃險爲號號曰洞主官司莫敢詰懷密禽伏法累擢江西右布政使轉左布政仕至南京刑部右侍郎

萬歷南昌府志

陳煒字文曜福建閩縣人天順四年進士授御史廷劾指揮門達寘之法中外快之遷江西按察副使斥貪殘

振頽靡決疑獄殲劇盜威望大振升按察使右布政使
時宗藩府第墳塋之費賸取不經煒條奏殺三之一轉

浙江左轄未赴卒於任

嘉靖林志 萬曆南昌府志

楊守隨字維貞一字貞庵浙江鄞縣人成化二年進士
授御史巡按江西者再清滯獄減折納革冗費禁和買
詰奸貪表廉善所至以風采見憚累官工部尙書掌大
理寺上章極論劉瑾奸狀瑾深銜之傳旨致仕尋除名
追毀誥命瑾誅復官又十年卒贈太子少保諡康簡從
弟守隅字維德成化二十年進士歷官江西參政有治
績甯府祿米石徵銀一兩後漸增十之五守隅入請於
王裁減如舊瑾惡守隨并罷守隅官瑾死後起官終廣

西布政使

明史 萬曆南昌府志 前上者舊傳

段正字以中山西澤州人成化二年進士由元城知縣擢監察御史巡按江西振饑備盜方略最多遷江西左參政精於吏事所檢察無遺奸撫州有糧長爲民害立除之追贓至數萬廣信苦夫役繁以寺觀租稅贏餘者使出傭直民困少甦居恆廉介夷險如一卒之日無以爲斂士大夫皆哀之

萬曆南昌府志

三

錢山字靜夫南直隸滁州人成化二年進士擢御史升江西僉事行部豐城會大水民饑山不俟請卽發倉粟振之所活甚眾仕至副使

江南通志

王有恬字德安福建長樂人幼穎慧好學登成化十一年進士歷南京戶部郎中升江西督糧參議先是民間逋稅由豪宗攬任代輸有恬至下令釐革積弊頓除淮

王就封道九江水陸費鉅萬有恬酌省其半乞歸後窮

約以終

福建通志

李蕙字德馨南直隸當塗人成化五年進士授刑科給事中升江西右參議轉右參政才識通敏歲饑上饒民羣發富人廩郡以行劫報蕙議止戮其渠餘得減死論南贛盜起將發兵勦之獨請下令撫諭未幾元惡就禽其黨皆解散後爲右都御史總督漕運

嘉靖林志 萬曆南昌府志

史琳字天瑞浙江餘姚人成化二年進士授給事中參

議江西吉安民殺其鄰子夜移屍道旁死者家莫知所

由訴於琳迹之弗得乃禱諸神果得殺人者案遂定贛

州盜起勢張甚琳捕斬七百餘人釋諸脅從者境內以

安升布政使仕至右副都御史

安志 謹案史琳見浙江通志選舉表及國子

監進士題名碑均
作張琳蓋榜姓也

洪鐘字宣之浙江錢塘人成化十一年進士以刑部郎
中奉命安輯江西福建流民還言江西安遠龍南流移
錯雜習鬪爭易亂宜及平時令有司立鄉社學教之詩
書禮讓宏治中厯官江西右布政使正德中總制湖廣
軍務卒諡襄惠

據明史
本傳補

魏英字士華浙江慈谿人成化十七年進士以御史清
軍江西厯官布政使宸濠方恣橫欲盡私南昌所屬河
泊課鈔英力拒之升貴州巡撫

舊志

周南字文化浙江縉雲人成化十四年進士厯江西按
察使宏治初升右布政使正德中督南贛軍務南贛巡
撫之設自南始大帽山賊張時旺等聚眾稱王攻剽城

邑延及江西廣東之境數年不靖官軍討之輒敗推官
莫仲昭知縣蔣璣指揮楊澤等被執賊勢愈熾南集諸
道兵擊之龍牙禽時旺餘黨悉平仲昭等得逸還捷聞
賜敕獎勞南乃移師會總督陳金共平姚源諸賊境內
遂甯九年春進右都御史總督兩廣軍務踰年乞歸卒

贈太子少保

明史

張璉字廷璧雲南平彝人成化五年進士宏治初南贛
盜起璉自郡守擢江西兵備副使建七縣城堡積糧糗
練士卒修器械設險隘人賴以安與上官論不合去盜
復熾廣東巡撫鄧廷瓚奏留之遂築南康城盜立解散
尋以疾歸璉剛正不阿遇疑難事迎機立斷歸之日囊

橐蕭然

雲南通志 贛州府志 謹案張璉見
浙江通志處州麗水人平彝其仕籍也

汪舜民字從仁南直隸婺源人成化十四年進士宏治初擢江西僉事善獄剖析如流其清軍法後人遵守

之官至南京都察院副都御史

據明史汪全傳補

金澤字德潤浙江鄞縣人成化二年進士累官都察院副都御史閩廣寇入贛州廷議以風力大臣爲總制遂以命澤至則一意督緝捕斬賊首林鳳滿天明等八百餘人奏於雲都會昌等七縣增設捕盜主簿及巡檢司諸官紀律嚴明一新政令尋升南京兵部侍郎轉南都察院右副都御史掌院事

嘉靖林志贛州府志

蘇葵字伯誠廣東順德人成化二十三年進士以翰林編修出爲江西提學僉事性剛介不苟合爲鎮守太監董讓誅奏被繫遣法司盛洪等卽訊將加以刑南昌諸

生數百人排闥而入擁葵去事竟得雪嘗修白鹿洞書院增置田廬招徠諸郡學者繼前督學李齡之績焉累

遷福建右布政使

萬應南
昌府志

邵寶字國賢無錫人成化二十年進士宏治中以戶部郎中遷江西提學副使釋菜周元公祠修白鹿書院學舍處學者其教以致知力行爲本江西俗好陰陽家言有數十年不葬父母者寶下令士不葬親者不得與試於是相率舉葬以千計甯王宸濠索詩文峻卻之後宸濠敗有司校勘獨無寶迹遷浙江按察使仕至南京禮部尙書卒贈太子太保諡文莊

明史儒林傳

沈銳字文進一字省齋浙江仁和人成化五年進士江西按察僉事擊服豪右貪墨吏悉解綬去尤孳孳以興

學化民爲務重修白鹿洞書院講道不輟轉廣東僉事

舊志

林俊字待用福建莆田人成化十四年進士宏治間爲南京右僉都御史督操江江西新昌民王武爲盜巡撫韓邦問不能靖命俊巡視身入武巢武請自效悉禽賊黨詔卽以俊代邦問俊引朱熹代唐仲友包拯代宋祁事力辭不允乃更定要約庶務一新王府徵歲祿率倍取於民以俊言大減省甯王宸濠貪暴俊屢裁抑之王請易琉璃瓦費二萬俊言宜如舊毋涉叔段京鄙之求吳王几杖之賜王怒伺其過無所得會俊以聖節按部遂劾奏之停俸三月尋以母憂歸武宗卽位言官交薦江西人在朝者合疏乞還俊乃進右副都御史再撫江

西遭父憂不果累官刑部尚書卒諡貞肅

明史 萬曆南昌府詳案

志云俊巡視江西歲饑盜起條奏振救之策及均徭里甲賦稅事宜一一施行已周歷郡邑問民疾苦去淫祠建義倉著社約表忠賢崇奸弊雖市販小害必懲之鋤強扶弱風紀凜然

王哲字思德南直隸吳江人宏治三年進士任御史巡

按江西風采峻整甯王宸濠方橫亦凜肅不敢或忤鎮

守中官董讓怙勢驕縱隱盜賊不以問哲劾其不法數

事旱種不入土乃親錄繫囚釋矜疑數十百人異日雨

是歲有秋善決疑獄人不能欺民爲之謠曰江西有一

哲六月飛霜雪天下有十哲太平無休歛升山東按察

副使累擢右僉都御史巡撫江西病歸卒或謂宸濠中

以毒云

嘉靖林志 萬曆南昌府志

蔡清字介夫福建晉江人成化二十年進士累官南京

文選郎中以憂歸正德改元卽家起江西提學副使取
士先德行後文藝甯王宸濠驕恣遇朔望諸司先朝王
次日謁文廟清不可先廟而後王王生辰令諸司以朝
服賀清曰非禮也去蔽膝而入王積不悅會王求復護
衛清有後言王欲誣以詆毀詔旨清遂乞休王佯挽留
且許以女妻其子竟力辭去清平生飭躬砥行貧而樂
施爲族黨依賴以善易名卒諡文莊

明史儒林
傳 白志

陳恪字克謹浙江歸安人成化二十三年進士歷官河
南左布政以才望調江西時宸濠肆虐鉗制方面恪議
夫價及賀禮多忤其意宸濠怒叱之恪不爲動將中以
奇禍會升都御史巡撫南贛遂獲免

嘉靖
林志

李夢陽字獻吉陝西慶陽人徙居開封宏治六年舉陝

西鄉試第一明年成進士正德中官江西提學副使樊介挺勵頑鈍以振作士氣敕諸生毋謁上官卽謁長揖毋跪所至采訪謠俗諸篤行義士貞婦烈女悉奏上風教大行後以筭淮王府校及與總督陳金御史江萬寶不合得罪冠帶閒住然江右士子猶誦義至今云

明史文苑

傳萬歷南昌府志

李情字宗善河南靈寶人宏治六年進士歷御史升江西按察副使整飭饒州兵備駐萬年縣時縣甫設姚源洞降賊王重七等復叛覘者告情宜急避情誓以死守變作遂遇害贈按察使廕一子入監

萬歷南昌府志安志舊志原案

明一統志云同九事者通判秦碧陳遠照磨馬璉指揮邢世臣千戶許政等

吳一貫字道夫廣東海陽人成化十七年進士由上高

知縣擢御史以彊幹聞遷大理右寺丞正德初官江西

副使討華林賊有功進按察使行軍至奉新卒士民立

忠節祠祀焉

明史王獻臣傳謝志原案明一統志稱一員督兵勦捕嚴申令信賞罰士卒奮勇

俘斬甚多建議築城賊至且戰且築至忘寢食以勞瘁卒

周憲字時敏湖廣安陸州人宏治六年進士正德中官

江西副使華林馬腦賊方熾陷瑞州總督陳金檄憲勦

之平馬腦砦及仙女雞公嶺諸寨先後斬獲千餘人華

林賊窘遣謀者詭言饑困狀憲信之移檄會師夾擊他

將多觀望憲攻北門三戰賊稍卻與子幹先登偪之賊

下木石如雨軍潰憲中槍幹前救力戰墮厓死憲創重

被執罵不絕口賊支解之事聞贈按察使予祭葬諡節

愍廕一子錦衣百戶旌幹門曰孝烈

明史忠義傳萬曆南昌府志

顧應祥字惟賢浙江長興人宏治十八年進士授饒州推官吏以其年少易之及見應祥剖決精敏乃大服姚源洞賊執樂平令以去應祥單騎叩其壘論以禍福令得還入爲錦衣衛經歷累官江西副使分巡南昌值宸濠初定撫瘡痍集流亡事皆井井仕至刑部尙書致仕

明儒學案

一統志

王奎字文明南直隸武進人宏治十五年進士選南京御史升江西按察司僉事德興令恃奧援貪黷奎按其奸旣勦姚源洞叛寇俘馘甚眾滿三載應隨例考績巡撫以私怨阻其行竟抑鬱以卒

江南通志

黃昭道字又顯南直隸吳江人宏治十二年進士正德中擢江西按察僉事甯王宸濠蓄逆謀招亡命劫彭蠡

諸處爲患昭道捕獲數百人訊治如法進山東巡海副

使擢雲南布政

江南通志

王秩字循伯南直隸崑山人成化二十三年進士正德

五年以江西副使備兵南贛時初設軍門於贛秩議開

廣鹽以給軍需汰浮冗以寬民力公私咸利賴焉贛有

劇盜張士錦竊據名號秩生禽之諸盜相繼降論功升

本省按察使甯庶人憚秩嘗邀秩幼子抱置膝上許以

郡主妻之秩辭謝退謂人曰王志滿氣揚陰養死士爲

亂不出十年矣尋擢雲南布政使乞養歸

據贛州府志補謹案秩

陳金平大壩山見明史金傳

徐藩南直隸泰州人宏治六年進士正德中爲江西參

議從都御史陳金討平東鄉寇嘉靖時累官工部右侍

郎據明史戴
銑傳補

董傑南直隸涇縣人成化二十三年進士

舊志作宏治
丁未進士誤

宏治無
丁未

以右副都御史巡撫江西時宸濠反形已具屢

餽遺傑拒不受時以忠義諷諭宸濠知不可奪每朝見

輒留飲忽一日飲歸語家人曰吾今日飲酒頭暈腹脹

豈有異物邪次日歿徧體皆赤家人皆知中毒不敢言

繼之者即孫燧也所著有儒行辨五城集

明史陽繼傳
像章書

趙鉞任南昌衛指揮使以捕盜功升都指揮僉事守備

南贛正德六年充叅將督兵剿馬腦華林山賊俘獲甚

眾時甯王宸濠為暴憾鉞執法不從己十三年三月召

入府飲之中毒而死宸濠復繫其妻孥掠其財貨鉞死

四日不得斂蒙禍甚慘

像章書
載指揮僉事

舊志原案豫章書又
戴宣以廣東守備

過家未及謁宸濠捕筆死留府長史王用才以同議撫按官見王府不具朝服事亦死於械繫

吳廷舉字獻臣其先嘉魚人祖成梧州遂家焉成化二十三年進士正德中楊一清薦其才擢江西右參政敗華林賊於連河從陳金大破姚源賊其黨走裴源復從俞諫破之賊首胡浩三既撫復叛廷舉往諭爲所執居三月盡得其要領誘使攜及得還浩三果殺其兄浩二內亂官兵乘之遂禽浩三定其地爲萬年縣以與副使李夢陽不協去官復起廣東右布政以右副都御史振湖廣饑定湖南諸夷疆地甯王宸濠有逆謀疏陳江西軍政六事爲豫防計後官南京工部尙書卒諡清惠明陳金字汝礪湖廣應城人徙武昌舉成化八年進士正德六年二月江西盜起詔金總制軍務許便宜從事當

是時撫州則東鄉賊王鉦五等南昌則姚源賊汪澄二
等瑞州則華林賊羅光權陳福一等而贛州大帽山賊
何積欽等又起官軍累年不能克金調廣西狼土兵助
戰先攻東鄉破之馘鉦五等移師姚源親統大軍搗其
巢俘斬五千餘人乘勝斬光權華林賊盡乎又擊大帽
山賊獲積欽俘斬千七百餘人半歲間勦賊幾盡遂卽
東鄉立縣並立萬年縣招降人居之前後每奏捷輒賜
璽書嘉勞資銀幣加太子少保廕子錦衣世百戶然金
所用目兵貪殘剽掠甚於賊金亦知民患之方倚其力
不爲禁又不能持廉軍資頗私入功雖多士民皆深怨
焉尋以招撫失策致賊首王浩八復叛召還以俞諫代
明史謹案陳全勦東鄉諸賊其始摧枯拉朽功施赫
然繼以新潰不與致土兵縱賊逸去又急欲成功一意

招撫賊倭復張功罪是非昭著信史
謹依原文錄入以著當官之法戒焉

俞諫字良佐浙江桐廬人父蓋官御史按江西治外戚
王氏萬氏宗族忤橫罪坐事謫澧州判官累遷鄖陽知
府諫舉宏治三年進士歷江西參議平大帽山賊累遷
右副都御史提督操江正德八年春姚源降賊王浩八
叛詔以諫代陳金督江西浙江福建諸軍討之時浩八
眾萬餘屯浙江開化爲同知伍文定等所敗遁還江西
德興以所執都指揮白宏江洪爲質求撫於按察使王
秩秩受之爲傳送姚源浩八奔據貴溪裴源山餘眾復
集連營十里諫令秩與副使胡世甯參政吳廷舉列屯
要害斷其歸路而躬與都督李鉉乘夜冒雨潛進大破
之俘斬數千人遂禽浩八其黨潰走玉山諫與南贛巡

撫周南江西巡撫任漢復擊斬七百餘人餘賊奔姚源
諫督廷舉等進勦偪禽之諫懲金失一意用兵而任漢
懦先爲布政使嘗贊金主撫雖亟上首功追賊緩餘黨
復起先是東鄉賊爲金所敗乞降隸世甯號新兵剽掠
如故旣懼罪復叛遣叅將桂勇等討禽之萬年雖立縣
賊尙眾吏胥多賊黨官府動息必知之副使李情治峻
急眾欲叛畏鉉在餘干不敢發會鉉卒王垂七胡念二
等遂作亂殺情及饒州通判陳達秦碧指揮邢世臣等
焚廨舍諫發兵禽之亂乃定言官劾諫及漢南兵部請
召漢還命諫兼領巡撫明年擊臨川賊斬其魁遣叅將
李隆擊新淦賊賊踞萬山中僭稱王且八年隆等深入
悉就禽俘斬千七百餘人錄功進諫右都御史巡撫如

故剽賊徐九齡者初嘯聚建昌醴源已出沒江湖間積三十年黃州德安九江安慶池州太平咸被其害諫討斬之羣盜悉平甯王宸濠諷御史張鼐山劾諫十一年

召還遂乞致仕嘉靖中掌都察院事卒官贈太子太保

諡莊襄據明史本傳補註案謝志不爲俞諫立傳然諫實能竟陳金之功因據史傳補入

李鉉大同右衛人世指揮同知正德中江西盜猖獗擢

署都督僉事與都御史俞諫同提督軍務賊王浩入據

裴源山憑高發矢石官軍幾不支鉉下馬持刀督將士

殊死鬪賊乃走追數十里禽之復以次討平劉昌三胡

浩三等移駐餘干將擊遺賊之未下者疽發背卒於軍

詔贈右都督廕子都指揮僉事據明史張俊傳補

胡世甯字永清浙江仁和人宏治六年進士性剛直不

畏強禦且知兵累官江西副使與都御史俞諫畫策禽盜討平王浩八以暇城廣昌南豐新城當是時甯王宸濠驕橫有異志世甯特疏請敕正止治其國毋撓有司以靖亂源銷意外變宸濠聞大怒列世甯罪徧賂權倖必殺世甯奏再上右都御史李士實等助之乃命錦衣官校逮捕時世甯已遷福建按察使取道還里聞命自投錦衣獄獄中三上書言宸濠逆狀卒不省繫歲餘謫戍瀋陽居四年宸濠果反世甯起戍中爲湖廣按察使尋擢右僉都御史巡撫四川厯官兵部尙書加太子太保卒贈少保諡端敏

明史
自志

張茂蘭字德馨山東章邱人宏治十八年進士正德九年以戶部主事權舟九江性清介雖資貨盈前意無所

動終其任視他司權者徵減十分之五人謂立關以來

所僅見云

據九江府志補

孫燧字德成浙江餘姚人宏治六年進士歷刑部郎中
慮江西獄多所平反正德十年十月以右副都御史巡
撫江西時甯王宸濠逆狀已大露前後巡撫或死或去
燧聞命歎曰是當死生以之矣遣妻子還鄉獨攜二童
入南昌南昌人洶洶謂宸濠旦暮得天子燧左右悉宸
濠耳目燧防察甚密左右不得窺獨時時爲宸濠陳說
大義卒不悅陰察副使許達忠勇可屬大事與之謀又
懲副使胡世甯得罪事知訟言於朝無益乃託禦他寇
豫爲備先城進賢次城南康瑞州患建昌縣多盜割其
地別置安義縣以漸弭之而請復饒撫二州兵備不得

復則請敕湖東分巡兼理之九江當湖衝最要害請重
兵備道權兼攝南康甯州武甯瑞昌及湖廣興國通城
以便控制廣信橫峯青山諸竄地險人悍則請設通判
駐弋陽兼督旁五縣兵又恐宸濠劫兵器假討賊盡出
之他所宸濠矚燧圖已使人賂朝中幸臣去燧而遺燧
棗梨薑芥以示意燧笑卻之遂勸燧先發後聞燧曰奈
何予賊以名且需之十三年江西大水宸濠素所蓄賊
凌十一吳十三閔念四等出沒鄱陽湖燧與遠謀捕之
三賊遁沙井燧自江外掩捕夜大風雨不克濟三賊走
匿宸濠祖墓閒於是密疏白其狀且言宸濠必反章七
上輒爲宸濠遮獲不得達宸濠恚甚因宴毒燧不死燧
乞致仕又不許憂懼甚明年宸濠脅鎮巡官奏其孝行

燧與巡按御史林潮冀藉是少緩其謀乃共奏於朝朝
議方降旨責燧等會御史蕭淮盡發宸濠不軌狀詔重
臣宣諭宸濠聞遂決計反六月乙亥宸濠生日宴鎮巡
三司明日燧及諸大吏入謝宸濠伏兵左右大言曰孝
宗爲李廣所誤抱民間子我祖宗不血食者十四年今
太后有詔令我起兵討賊眾相顧愕眙燧直前曰安得
此言請出詔示我宸濠曰毋多言我往南京汝當扈駕
燧大怒曰汝速死耳天無二日吾豈從汝爲逆哉宸濠
怒叱燧燧益怒急起不得出宸濠入內殿易戎服出麾
兵縛燧逵奮曰汝曹安得辱天子大臣因以身翼蔽燧
賊并縛逵二人且縛且罵不絕口賊擊燧折左臂與逵
同曳出逵謂燧曰我勸公先發者知有今日故也燧逵

同遇害惠民門外燧生有異質兩目爍爍夜有光死之日天忽陰慘烈風驟起凡數日民大恐走收兩人屍屍未變黑雲蔽之蠅蚋無近者世宗卽位贈禮部尙書諡忠烈與達並祀南昌賜祠名旌忠錄一子世襲錦衣千戶

明史忠義傳萬厯南昌府志自志

黃宏字德裕浙江鄞縣人宏治十五年進士知萬安縣民好訟訟輒禱於神宏毀其祠曰令在何禱也訟者至輒片言折之調泰和遷戶部主事厯江西左參議按湖西嶺北二道王守仁討橫水桶岡賊宏主餉有功賊閔念四旣降復恃宸濠勢剽九江上下宏發兵捕之走匿宸濠祖墓中盡得其輜重以歸宸濠逆節益露士大夫以爲憂宏正色曰國家不幸有此我輩守土死而已有

持大義不從宸濠黨者宏每陰左右之及反宏被執憤
怒以手楷向柱擊頂是夕卒賊義而斂之子紹文奔赴
求得其棺以僞命治斂非父志亟易之扶歸世宗立贈
宏太常少卿又有馬思聰者字懋聞福建莆田人宏治
末舉進士以南京戶部主事督糧江西駐安仁值宸濠
生日或勸勿往思聰曰吾欲覘之以疾報天子耳遂被
執繫獄不屈絕食六日死世宗立贈光祿少卿與宏並
配享旌忠祠時有謂宏思聰死節非眞者給事中毛玉
勘江西逆黨復請表章宏思聰及承奉周儀而宏子紹
武訴於朝巡按御史穆相列上二人死節狀甚悉遂無

異議

明史忠義
傳白志

王守仁字伯安浙江餘姚人弱冠舉鄉試好言兵善射

登宏治十二年進士正德元年以救言官戴銑忤劉瑾
自兵部主事杖謫龍場驛丞瑾誅量移廬陵知縣累官
南京鴻臚卿兵部尙書王瓊素奇其才十一年八月擢
右僉都御史巡撫南贛時南中盜賊蜂起謝志山據橫
水左溪桶岡池仲容據洌頭皆稱王與大庾陳曰能樂
昌高快馬柳州龔福全等攻剽府縣而福建大帽山賊
詹師富等又起前巡撫文森託疾避去志山合樂昌賊
掠大庾攻南康贛州贛縣主簿吳玘戰死守仁至知左
右多賊耳目乃呼老黠隸詰之賊栗不敢隱因貰其罪
令訶賊賊動靜無不知於是檄閩廣會兵先討大帽山
賊親率銳卒屯上杭佯退師出不意搗之連破四十餘
寨俘斬七千有奇遂禽師富疏言權輕無以令將士請

給旗牌提督軍務得便宜從事尙書王瓊奏從其請乃更兵制二十五人爲伍伍有小甲二伍爲隊隊有總甲四甲爲哨二哨爲營三營爲陣二陣爲軍皆臨事委不命於朝副將以下得遞相罰治其年七月進兵大庾敗志山繫曰能以歸遂討橫水左溪守仁自駐南康去橫水三十里先遣四百人伏賊巢左右進軍偪之賊方迎戰兩山舉幟賊大驚謂官軍已盡犁其巢遂潰乘勝克橫水志山及其黨皆走桶岡左溪亦破未幾邢珣等復以計破桶岡志山等皆面縛降乃設崇義縣於橫水還至贛州議討洑頭賊悉禽戮之乃於下洑立和平縣置戍而歸自是境內大定進右副都御史予世襲錦衣衛百戶再進副千戶十四年六月奉命勘福建叛軍行至

豐城而甯王宸濠反守仁急趨吉安與伍文定徵調兵食治器械舟楫傳檄暴宸濠罪俾守令各率吏士勤王因集眾議水陸並進揚言大兵數十萬且至欲以疑宸濠使不東下宸濠果徘徊不敢動久之乃襲下九江南康出大江薄安慶守仁聞南昌兵少則大喜趨樟樹鎮臨江知府戴德孺等各以兵來會或請救安慶守仁曰不然今九江南康已爲賊守我越南昌與相持江上二郡兵絕我後是腹背受敵也不如直擣南昌賊精銳悉出守備虛我軍新集氣銳攻必破賊聞南昌破必解圍自救逆擊之湖中蔑不勝矣眾曰善己酉次豐城以伍文定爲前鋒先遣奉新知縣劉守緒襲其伏兵庚戌夜半文定兵抵廣潤門守兵駭散辛亥黎明諸軍梯縋畢

登撫安士民慰諭宗室宥脅從之徒誅違令之卒人心大悅居二日卽發兵躡宸濠後別以奇兵設伏宸濠果自安慶還兵戰於黃家渡伏發賊大潰退保八字腦宸濠懼盡發南康九江兵守仁遂遣兵乘虛復取二郡丙辰復戰官軍卻守仁斬先卻者諸軍殊死戰賊復大敗退保樵舍明日官軍奄至以小舟載薪乘風縱火焚其副舟妃婁氏以下皆赴水死宸濠倉卒易舟遁追執之從逆諸臣皆就禽南康九江亦下凡三十五日而賊平初京師聞變諸大臣皆震懼王瓊大言曰王伯安居南昌上游必禽賊至是果奏捷帝時已親征命安邊伯許泰太監張忠等率京軍抵南昌守仁亟解俘以獻至錢塘遇太監張永以俘屬之而身至京口欲朝行在間巡

撫江西命乃還南昌忠泰已先至恨失宸濠故縱京軍
嫚罵守仁不爲動撫之愈厚京軍皆悅會冬至守仁命
居民巷祭已皆上冢哭悲號震野京軍離家久聞之無
不泣下思歸者忠泰不得已班師世宗卽位論功封特
進光祿大夫柱國新建伯世襲歲祿一千石嘉靖六年
以原官兼左都御史總督兩廣兼巡撫予鐵券乞病歸
行至南安卒年五十七喪過江西軍民無不縞素哭送
者隆慶初詔贈新建侯諡文成予世襲伯爵萬厯十二
年從祀孔子廟廷

明史

徐讚字朝儀浙江永康人宏治十八年進士擢御史巡
按江西勦捕湖寇徐九齡等數百人甯王宸濠久蓄異
謀潛結羣寇爲助讚翦其羽翼之勁者累官工部右侍

鄖舊志

江西通志卷二十一 統緒

三

范輅字以載湖廣桂陽人正德六年進士以御史清軍江西甯王宸濠令諸司以朝服見輅不可奏言高帝定制王府屬僚稱官後乃稱臣其餘文武及京官出使者皆稱官朝使相見以便服今天下王府儀注制未畫一臣以爲尊無二上凡不稱臣者皆不宜具朝服以嚴大防章下禮官議宸濠馳疏爭之廷議請如輅言宸濠伶人秦榮僭侈輅劾治之又劾鎮守太監畢真貪虐十五事疏留不下真乃撫他事誣之遂逮下詔獄值帝巡幸淹繫經年至十四年四月始謫龍州宣撫司經歷未幾宸濠及真以謀逆誅御史謝源伍希儒等交章薦未及召世宗立復故官遷福建僉事轉江西副使致仕歸又

用胡世甯薦起密雲兵備副使歷江西福建左右布政

使卒官

明史

鄭岳字汝華福建莆田人宏治六年進士累官江西按察使就遷左布政使宸濠奪民田億萬計民立砦自保宸濠欲兵之岳持不可會提學副使李夢陽與巡按江萬實相訐岳承檄按之夢陽執岳親信吏言岳子沅受賕欲因以脅岳宸濠因助夢陽奏其事帝遣大理卿燕忠會給事中黎奭按問岳遂奪官爲民世宗初擢右副都御史巡撫江西兵荒之後奏減常賦二十萬帑爲宸濠所株累者若干家累遷兵部左侍郎乞休去

明史萬歷南

昌府志

許達字汝登河南固始人正德三年進士長身巨口猿

臂燕領沈靜有謀略以靖寇功自樂陵知縣超擢山東兵備僉事遷江西副使時宸濠黨暴橫甚達以法痛繩之嘗言於孫燧曰甯王敢爲暴者恃權臣也權臣左右之者貪重賄也重賄由於盜藪今惟翦盜則賄息賄息則交解交解則黨孤燧深然之每事輒與密議及宸濠縛燧達爭之宸濠素忌達問許副使何言達曰副使惟赤心耳宸濠怒曰我不能殺汝邪達罵曰汝能殺我天子能殺汝汝反賊萬段磔汝汝悔何及宸濠大怒并縛之曳出斫其頸屹不動賊眾共推抑令跪卒不能遂死年三十六世宗卽位贈左副都御史諡忠節廕一子又錄山東平賊功復廕一子嘉靖元年詔達死事尤烈改贈禮部尙書進廕指揮僉事

明史忠義傳

伍文定字時泰湖廣松滋人登宏治十二年進士有膂力便弓馬議論慷慨正德中由河南知府調知吉安府計平永豐及大茅山賊已佐巡撫王守仁平桶岡橫水宸濠反吉安士民爭亡匿文定斬亡者一人眾乃定急以卒三百迎王守仁於峽江知府邢珣徐連戴德孺等亦先後入城協謀討賊丙辰之戰文定身犯矢石火燎鬚不動賊平功最擢江西按察使張忠許泰至南昌欲冒其功而守仁已俘宸濠赴浙江忠等失望大恨文定出謁遂縛之文定罵曰吾不恤九族爲國家平大賊何罪汝天子腹心屈辱忠義爲逆賊報讐法當斬忠益怒椎文定仆地文定求解任不報尋遷廣東右布政使未赴而世宗嗣位上忠等罪狀又請發宸濠資財還之江

西以資經費矜釋忠泰所陷無辜及甯府宗人不預謀者以清冤獄帝並嘉納之論功進右副都御史提督操江仕至兵部尙書卒於家天啟初追諡忠襄

明史

楊茂元字志仁浙江鄞縣人成化十一年進士正德中官江西參政甯府每歲誅求祿米民不堪命茂元率眾往諭之甯府憚其威名常數外秋毫不敢過有餘羨糧長請以實庫茂元曰此小民物也給還之仕至刑部右

侍郎

明史楊守陳傳萬曆南昌府志豫章書

張嶺字時峻浙江蕭山人成化二十三年進士授上饒知縣量田土清稅糧實心爲民不徼聲譽正德中累擢江西右參政進右布政使舉治行卓異遷左布政甯王宸濠欲拓地廣其居以擬大內嶺執不可大恚遣人餽

之物發視則棗梨薑芥蓋隱語也未幾召為光祿卿官

至南京工部尙書

明史府志

萬曆南昌浙江通志

唐龍字虞佐浙江蘭谿人正德三年進士除郟城知縣

徵授御史出按雲南再按江西時宸濠已就禽疏趣張

忠許泰班師三司官從宸濠叛者猶居位龍召數之曰

脅從罔治謂凡民耳若輩讀書食祿何覲顏乃爾立收

其印綬擢陝西提學副使歷官兵部尙書總制三邊軍

務吏部尙書加太子太保卒諡文襄

明史謹案明一統志萬曆南昌府

志龍按江西疏請班師如解倒懸列從逆之罪表劉源

清馬津之功劾鎮監崔和之黷貨辨雪脅從先後所上

九十餘疏無非為民請命師旅之後水旱相仍龍百方

獨振民困以蘇論者謂其功不在王守仁下去官後肖

邵銳字士抑

一作思抑

浙江仁和人正德三年會試第一由

翰林編修厯官江西提學僉事抑浮崇實士風爲之不
變改福建提學副使厯太僕卿告歸卒贈右副都御史

諡康僖

萬厯南
昌府志

劉璽字廷守龍驤衛人正德末任江西都指揮僉事巡
撫盛應期知其廉明每屬以疑獄多所平反巡按穆相
薦總漕運璽奏三十餘疏垂爲良法尋以忤當道罷歸

江南
通志

周廣字克之南直隸崑山人宏治十八年進士厯知蒲
田吉水二縣正德中以治最徵授御史卽疏陳四事糾
錢甯不法狀甯大怒留之不下傳旨謫廣東懷遠驛丞
越二年遷建昌知縣有惠政甯矯旨再謫竹寨驛丞世
宗卽位復故官厯江西副使提督學校嘉靖二年舉治

行卓異擢福建按察使六年以右僉都御史巡撫江西
墨吏望風去將限豪右田不果明年拜南京刑部右侍
郎居二年暴疾卒嘉靖末贈右都御史廣平生嚴冷無
笑容居官公彊弗受請託士類莫不憚之

明史

盛應期字思徵南直隸吳江人宏治六年進士嘉靖元
年巡撫江西宸濠亂後瘡痍未復奏免雜調緡錢數十
萬請留轉輸南京米四十七萬銀二十萬以食饑民又
令諸府積穀備荒至百餘萬尋進兵部右侍郎總督兩

廣軍務

明史

陶諧字世和浙江會稽人宏治八年鄉試第一明年成
進士選庶吉士嘉靖元年除江西僉事累擢右副都御
史提督南贛汀漳軍務疏言守令遷太驟宜以六年爲

期又奏今天下差徭煩重既有河夫機兵打手富戶力
士諸役乃編審里甲復徵贖丁課及供億諸費乞皆罷
免帝采納之官至兵部左侍郎卒贈尙書諡莊敏

明史

穆相字伯寅陝西三原人正德十六年進士巡按江西
劾鎮守中官黎鑑風采屹然問俗察奸不辭勞瘁歿於

甯州

明一統志

查約字源博浙江海甯人宏治十五年進士嘉靖二年
任江西副使多惠政冰檠自勵治行爲一時最官至山

東巡撫

白志

余珊字德輝南直隸桐城人正德三年進士世宗立擢
江西僉事討平梅花峒賊珊律已清嚴居官甚有威惠
仕至四川按察使

明史

潘希曾字仲魯浙江金華人宏治十五年進士嘉靖四年以右副都御史巡撫南贛討平惠州賊賴貴斬泐頭賊曾蛇仔等召爲工部右侍郎改兵部卒贈兵部尙書

舊志 贛州府志

顧珀字載祥福建晉江人宏治十二年進士累官江西左布政使雅志沖澹未嘗以家累自隨會詔有龍虎山之役珀不忍派於民因覈司藏見三巨簞封識凝塵啟視之約數千金亡其籍矣遂報巡按抵工費餘以當歲例入之戶部至今頌清節焉

萬曆南昌府志

黃卿字時庸山東益都人正德三年進士歷江西參政左右布政使清介峻特出入無私捐俸繕學宮及城隍廟奉計攜圖書數卷以行有清風兩袖獨朝天之頌卒

於官 萬應南
昌府志

徐一鳴字伯和湖廣醴陵人正德十二年進士由吏部

驗封郎中升江西提學副使崇正學正文體創湖東書

院以課士以毀淫祠為鎮守中官所憾劾以鈔掠寺觀

械繫入京廷臣交章論救事竟白謫官以歸 萬應南
昌府志

林庭梈字利瞻福建閩縣人宏治十二年進士授兵部

主事嘉靖中官江西參政歷湖廣左右布政使舉治行

卓異終工部尚書卒諡康懿江西舊無通志庭梈與副

使周廣始為之書成凡三十七卷其後因事踵修實導

源於此云 明史林瀚傳
四庫全書總目 白志 欽定

周用字行之南直隸吳江人宏治十五年進士正德中

官南京兵科給事中請治鎮守江西中官黎安罪出為

廣東參議嘉靖八年擢右副都御史巡撫南贛以廉潔
著有巨盜數輩阻山橫行捕久不獲用廉其黨有悔悟
者召至諭以利害因以賞誘之遂俘斬來獻已而慨然
曰爲盜有源不窒其源則流不塞移書屬邑薄賦平徭
緩兵餉之征期年盜不復作初橋廠權商稅重商皆避
而他趨餉不給用調其輕重著爲例商復趨之贛豪室
多隱其田額以虛稅竄貧戶用命履畝丈額盡革其私
賦役以均吉安撫州二府屬縣多接壤民俗詭訟難勾
攝用建議增轄時以爲便官至吏部尙書卒贈太子太

保諡恭肅

明史

豫章書

贛州府志

徐階字子升南直隸華亭人嘉靖二年進士第三人授
翰林院編修歷官江西按察副使視學政以正文體端

士習爲先創王守仁祠及同仁祠用風後學士至今慕之仕至吏部尙書武英殿大學士卒諡文貞

明史 萬曆南昌府志

志

唐胄字平侯廣東瓊山人宏治十五年進士以右副都

御史巡撫南贛贛塘堞庫小胄增築樓櫓又疏請置湖

西道檄守巡分駐臨江吉安令緩急可恃半年改撫山

東仕至戶部左侍郎卒贈右都御史

明史 贛州府志

魏謙吉直隸柏鄉人嘉靖十七年進士以御史巡按江

西有風裁墨吏豪猾罔不悚息時歲大饑奏蠲全稅復

出贓鍰爲糴民賴以生

明一統志

范欽字堯卿一字東明浙江鄞縣人嘉靖十一年進士

十九年任袁州知府性蹈厲有西門豹之風善詰奸蠹

屬境爲之肅然且念民貧賦重力請於上得少蠲百姓
尤德焉遷副使備兵九江九江多盜欽令衛所各率本
部分駐水陸以資策應盜盡駭散累官副都御史巡撫
南贛汀漳諸郡擒劇寇李文彪平其寨繼又擒大盜馮
天爵奏築程鄉縣濠居邨城駐以通判以消豫章閩粵
三省之奸設二叅將於漳潮惠韶閒以備倭患俱從之
升兵部右侍郎

浙江通志
甬上耆舊傳
袁州府

魏一恭字道莊福建莆田人嘉靖八年進士授温州府
推官歷升江西左參政分守南昌道孤介剛方人莫敢
犯平生絕不苟取雖交際至微亦峻卻嘗自言不戀官
不愛錢不惜命則何事不可爲人以爲名論遷廣西左
布政使

安志

虞守愚字惟明浙江義烏人嘉靖二年進士以左僉都御史提督南贛軍務築黃鄉城遷羊角水堡復長沙營勦程鄉大埔上杭會龍流賊修復書院增立社學行免役振荒諸政仕至南京刑部侍郎

贛州府志

張岳字惟喬福建惠安人正德十二年進士授行人以諫武宗南巡杖闕下謫南京國子學正嘉靖中復故官厯主客郎中升廣西提學僉事進按察副使提學江西坐事謫廣東鹽課提舉累擢右僉都御史巡撫江西甲辰乙巳歲大饑岳偕巡按魏謙吉設法措振奏留京折銀五萬兩又請折正兌米數十萬石以故饑而不害嘗奉詔爲嚴嵩建延恩閣供費有節嚴謝曰足下伯夷之所築也又裁貴溪夏言工築之費夏亦舉愛人以德爲

謝其風尙如此擢兩廣總督加右都御史卒於軍贈太

子少保諡襄惠

明史 萬曆
南昌府志

沈越字中甫應天江甯人嘉靖十一年進士巡按江西

執法峻整時嚴嵩當國意有所不悅以旨授越越不從

嵩銜之坐甲辰監試事被議左遷開州判

江南
通志

譚太初字宗元廣東始興人嘉靖十七年進士授工部

主事歷官江西副使清軍多所釋御史孫慎以失額爲

疑太初曰失額罪小殃民罪大嚴嵩親黨奪民田治之

不少貸遷廣西右參政投劾歸隆慶中累官南京戶部

尙書卒諡莊懿

明史

鄭世威字中孚福建長樂人嘉靖八年進士官江西僉

事清儉侃直大學士夏言里居巡撫爲設醺壇祈嗣世

威獨不往嘗謁言聞人令從角門入世威不從言爲啟
中門乃入尋轉副使督驛傳革借關夫馬之弊時嚴嵩
柄國世威絕不通問嵩族有犯者抵以重法無所徇人
皆服其操官至吏部右侍郎卒諡恭介列卿錄萬
歷南昌府志
李循義字時行浙江鄞縣人嘉靖二年進士以御史出
按江西有趙尙書子劫人妻某御史女爲姦創其夫亡
匿父宅循義並遣人破戶出之治以法高安吏部郎況
氏宅近學宮侵宮旁地爲園循義行部至諸生訟之卽
毀況氏垣反其侵陟前後論薦豫章人才如熊浹歐陽
鐸鄒守益詹泮等後俱爲名臣夏言治新第欲徙旁近
十餘家以大其宅循義不可由是有隙會嚴嵩方欲傾
言聞之使人語循義論言開邊事循義曰恢復議正吾

不敢毀大臣以媚大臣嵩慚出循義為衡州知府

據浙江通志

志甬上者舊傳補

謹案余有丁戴鯨墓志云鯨為江西僉事考功郎況維垣欲毀學垣為廬舍託御史李某

為請鯨曰況君非孔子徒乎不許況噪之以蜚語謫鄧

州通判云云放戴鯨以十年任僉事在循義之前一拒

於未成一毀於已成俱有

功於廟學因附著於此

高鏞字京甫四川內江人嘉靖二十三年進士由平陽

令徵拜御史巡按江西時嚴嵩柄政鏞逮其家不法者

無少徇竟以此失歡外補累官南曹郎致政歸篋無長

物四川通志

馮岳字望之浙江慈谿人嘉靖五年進士任江西左布

政使錢糧不任庫官郡邑以事來謁者輒屬之篋視出

入吏胥弊絕藩政肅清至今守其成式累官南京刑部

尚書

萬應南昌府志

談愷字守教南直隸無錫人嘉靖五年進士先以戶部員外郎監兌江西甚有清譽三十二年以右副都御史巡撫南贛諭降贛賊李文彪旋以其眾征海寇盡殲之賜白金文綺進兵部右侍郎

贛州府志

汪尙甯字廷德南直隸歙縣人嘉靖八年進士以右副都御史巡撫南贛爲祠祀濂溪陽明聚多士講學其中有大猾僭號稱王尙甯授方略戮其渠散諸脅從者事平未及論功以執政嫌之罷歸

贛州府志

李一瀚字源甫浙江仙居人嘉靖十七年進士歷御史升江西按察僉事平衡鹽政無令騰踊以病民復武陽郡公廟祀疏超溪水利歷右副都御史

萬曆南昌府志

萬士和字思節南直隸宜興人嘉靖二十年進士改庶

吉士授禮部主事改南京兵部累遷江西僉事歲裁上
供盜器千計民便之歷官江西按察使仕至南京禮部
尙書卒贈太子少保諡文恭

明史
白志

王鈞字子宜浙江會稽人嘉靖二年進士以右副都御
史提督南贛汀漳軍務所轄多峒賊嘗出爲患調兵轉
餉無虛日鈞至罷諸煩苛責郡縣恤瑣獨撫流離遂不
煩兵而定官至工部尙書卒諡恭簡

贛州
府志

王宗沐字新甫浙江臨海人嘉靖二十三年進士授刑
部主事與同官李攀龍王世貞輩以詩文相友善宗沐
尤習吏治歷江西提學副使修白鹿洞書院引諸生講
習其中就遷按察使右布政使作江西大志爲目凡七
曰賦書曰均書曰藩書曰漑書曰實書曰險書曰陶書

至今奉以爲準官至刑部右侍郎卒贈刑部尙書天啟

初追諡襄裕

明史舊志

胡松字汝茂南直隸滁州人嘉靖八年進士官江西左布政使晉右副都御史巡撫其地所部多盜松奏設南昌南豐萬安三營遣將討捕以次削平進兵部右侍郎巡撫如故以會計廣東巨寇張連及援閩破倭功兩賜銀幣松潔己好修富經術鬱然有聲望累官吏部尙書

卒贈太子少保諡恭肅

明史

舊志原案豫章書閩廣

抵廣信府去賊百里議者謂賊勢銳宜觀變松曰不然古人雪夜俘賊出不意也予新任賊不虞猝至卽往臨之立驚潰矣一晝夜竟達撫州諸路並進賊遂大敗此嘉靖辛酉年事也明年張連作亂松陳四事上之曰增置府縣精選守令互相策應亟議招徠俱報可

馬森字孔養福建懷安人嘉靖十四年進士授戶部主

事權九江關以廉能著厯太平知府再遷江西按察使
進士某嬖外婦殺妻撫按欲緩其獄森卒抵之法厯左
布政就擢巡撫右副都御史森久厯江西多惠政入爲
刑部右侍郎官至南京戶部尙書卒贈太子少保諡恭

敏

明史
白志

陸穩字汝成浙江歸安人嘉靖二十三年進士厯官江
西左布政使四十年閩廣山寇四起流劫江西郡縣賊
渠張連僭號改元勢甚熾擢穩右副都御史巡撫南贛
未至擊退流賊於吉安比至虔申明賞罰先平上杭賊
李占春程鄉賊徐東州麻陽賊袁三峒賊謝文贊黃積
山等遂合四省兵會征穩督和平哨授計叅將俞大猷
誘賊黨爲內應生得連於漳州毀其巢穴捷聞遷兵部

右侍郎仍撫其地穩號令嚴整懸賞購賊千金無所惜

故贛兵所向輒克

贛州府志
浙江通志

陳茂禮字履卿浙江慈谿人嘉靖二十九年進士博綜

墳典通太乙奇門家言以禦倭功擢江西兵備副使姚

源故巢賊盤踞滋蔓巡撫何頤

疑當作何思江西巡撫
題名碑及舊志俱無何

頤其聞茂禮至卽以兵屬之茂禮分左右哨三路進約

日同發獨空其要路一面潛令指揮某率精兵三百伏

道側戒之曰某日時有衣色衣而奔者皆賊也悉擒之

賊聞三道進兵而一路獨無果易服從無兵處遁伏兵

起掩之悉平

據兩浙名
賢錄補

汪一中字正叔南直隸歙縣人嘉靖二十三年進士由
開封府推官歷江西副使四十年鄰境賊入寇薄泰和

一中方讌投箸起曰賊鼓行而西掩我不備不早計且無噍類豈飲酒時乎當路遂以討賊屬之先是泰和巡檢劉芳力戰死賊怒磔其屍一中至率諸將吏祭曰爾職抱關猶死疆事吾待罪方面不滅賊何以生爲遂誓師列陣鼓之俘五人斬首以徇旦日陣如前會賊至左右軍皆潰賊悉赴中軍中軍亦潰一中躍馬當賊鋒射殺二人手刃一人左脅中鎗二臂中刀三與指揮王應鵬千戶唐鼎皆死妻程投於井家人出之不食五日死事聞贈光祿卿諡忠愍妻程並贈卹如例

明史忠義傳

陶承學字子述一字方塘浙江會稽人嘉靖二十六年進士視兵九江值贛州賊擾臨江吉安境戕副使汪一中陷玉山縣江右倭擾承學大治兵湖口遏賊衝逸議

事安慶還至黃石磯與賊帥袁三遇磨舟師進薄之繚

斷帆解勢將殆適射賊舟亦斷繚遂盡殲賊

安志 浙

謝志原案九江府志云故事守巡道於常作外例有虞

給承學第取蔬肉而已積贏數百金及升湖廣參政去

之日或請受之承學不可固請則曰郡城惡矣盍繕諸

遂以之培築府城工竣郡人勒石紀其事懸官刑部尙

書

俞大猷字志輔福建晉江人山世職百戶舉嘉靖十四

年武會試除千戶累以平賊功代劉遠為浙江總兵官

逮下詔獄再起為鎮守叅將廣東饒平賊張連敗攻陷

城邑積年不能平四十年七月詔移大猷南嶺合閩廣

兵討之時胡宗憲兼制江西知連遠出檄大猷急擊大

猷謂宜以潛師擣其巢攻其必救奈何以數萬眾從一

夫浪走哉乃疾引萬五千人登柏嵩嶺俯瞰賊巢連果

還救大猷連破之斬首千二百餘級賊懼不出用間誘連出戰從陣後執之并執賊魁蕭雪峯廣人攘其功大猷不與較散餘黨二萬不戮一人擢副總兵協守南贛汀漳惠潮諸郡遂乘勝征程鄉盜平之擢福建總兵官四十二年十月徙鎮南贛明年改廣東潮州大猷爲將廉馭下有恩數建大功威名鎮南服用兵先計後戰不貪近功所在有大勳卒贈左都督諡武襄

明史

盧岐嶷字子稷福建長泰人嘉靖二十三年進士四十年任按察僉事備兵湖西廣寇犯臨江遠近震駭岐嶷率兵往援厚恤死士士爭感激用命俘馘相望於道賊

宵遁一郡以安

據臨江府志補

鄭逵字世美福建閩縣人嘉靖二十九年進士仕至江

西參議祖琳居官以剛介稱述有祖風亦不能俯仰於人大學士嚴嵩奪民漑田湖塘培以爲宅來訴者幾千人逮命各荷鍤從須臾復其舊以還於民嵩怒甚人皆危之未幾嵩敗得無恙

福建通志

李佑字吉甫福建崇安人貴州清平衛籍嘉靖二十六年進士歷官江西副使程鄉賊敗奔瑞金佑邀擊之三戰皆捷又敗廣東賊吳志高下歷賊賴清規等皆賜銀幣進江西右參政偕總兵官俞大猷大破劇賊李亞元擢僉都御史巡撫廣東

明史譚綸傳舊志

陳大賓字敬夫湖廣江陵人嘉靖二十三年進士四十年爲湖西參政時郊壘甫靖大賓滌姦飭防肅紀宣惠境內底安臨江郡學瀕江度地遷之捐俸以濟其用

民罔有勞費官至副都御史卒年六十自大賓後萬厯中有唐汝迪者分守湖西以和平慈愛倡羣吏興革得宜名與大賓相埒部民咸愛戴之汝迪南直隸宣城人

嘉靖三十五年進士

據臨江府志補

栗永祿字士學山西長治人嘉靖二十三年進士任江西按察使風裁峻厲會當籍嚴嵩家當事者承望風旨株連及平民以盈其數破產相屬永祿憐之審釋者以千計南昌縣積蠹十餘輩假緝訪寄頓習取民財悉捕置之法一方始安累擢兵部右侍郎

萬厯南昌府志安志

吳百朋字惟錫浙江義烏人嘉靖二十六年進士授永豐知縣厯官右僉都御史提督軍務巡撫南贛汀漳與兩廣總督吳桂芳討平河源賊李亞元程鄉賊葉丹樓

兵威大振先是賊據三巢荼毒信豐龍南安遠諸縣境
三巢者岑岡高沙下厯也而下厯酋賴清規尤桀黠四
十四年進右副都御史巡撫如故疏請討之乃籌兵食
練將卒命守備蔡汝蘭討禽清規於苦竹嶂羣賊震懾
改設定南縣境內以安厯官至刑部尙書卒

明史
列傳錄

秦鈞字鳴和浙江慈谿人嘉靖二十九年進士任江西
左布政使政治嚴明金錢出入悉委之屬官羨餘儲爲
公帑官舍中僅家僮一二輩去官日行李蕭然

安志

周如斗字允文浙江餘姚人嘉靖二十六年進士授貴
溪知縣擢御史厯右副都御史巡撫江西江西民積困
差徭如斗稔知之勅議行條鞭法手自勾稽寢食俱廢
以勞瘁卒官疾革對諸司惟語條鞭本末不及其他士

民巷哭肖像以祀

安志

丁應璧字爲章山東壽光人嘉靖四十一年進士由南京兵部郎中升南昌知府歷江西按察副使爲政簡易有體不屑與僚屬競短長性廉介敝衣疏食以風吏民尤不喜玩好有以盆魚餉之者應璧佯不解烹其魚隆

慶閒晉山西參政

豫章

劉光濟字憲謙南直隸江陰人嘉靖二十三年進士隆慶初以右副都御史巡撫江西先是巡撫周如斗議立條鞭法未就光濟至銳意奏行定爲四差民悉輸金於官官爲僱役自是輕重適均徭役之困永絕又創坊甲條鞭如里甲法人以爲江右百世之利云官至南京吏

部尙書

萬應南昌府志安志

張翀字子儀廣西柳州人嘉靖三十二年進士授刑部主事以劾嚴嵩父子亂政下詔獄謫戍穆宗嗣位召爲吏部主事再遷大理少卿隆慶二年以右僉都御史巡撫南贛所部萬羊山跨湖廣福建廣東境故盜藪四方商民種藍其閒至是盜出劫翀遣守備董龍勦之龍聲言按山諸藍戶大恐盜因煽之嘯聚千餘人兵部令二鎮撫臣協議撫勦之宜久之乃定南雄劇盜黃朝祖流劫諸縣轉掠湖廣勢甚熾翀討禽之移撫湖廣

明史

劉思問字汝知河南孟縣人嘉靖三十五年進士萬厯初以僉都御史巡撫南贛承湖粵寇平之後刻意振刷南安民有被劫者營之客兵與焉誣郡士以冀脫罪思問檄攝郡雪其枉無何眞盜獲於韶州將士駭愕尤加

意庠序選士之雋者集書院課之文風大振官至南京

戶部尙書

贛州府志

江一麟字仲文南直隸婺源人嘉靖三十二年進士萬
厯閒以副都御史巡撫南贛豁達大度喜怒不形與贛
守葉夢熊守道張士佩巡道朱茹密策進兵平安遠黃
鄉賊破其巢渠魁授首升總督漕運都御史贛人立祠

祀之

贛州府志

潘季馴字時良浙江烏程人嘉靖二十九年進士授九
江府推官擢御史萬厯四年巡撫江西德化縣桑落洲
隄圯損民田季馴捐資築之五閱月告成凡七十餘里
視封郭洲三倍有奇至今爲沃壤

明史九
江府志

郭孝字可忠浙江仁和人嘉靖三十八年進士萬厯初

任江西副使分巡饒南饒襟帶長江洪濤千里盜賊剽掠行旅苦之孝增置戰艦星布要津賊由此受捕江道遂清嘗獲礦盜數百人悉杖而遣之曰此貧乏者求延

旦夕耳不以功聞也屢遷至按察使致仕歸

據浙江通志補

李天植字性甫南直隸廣德州人隆慶五年進士任饒南道參議時毀天下書院當事者希執政意欲併廢白

鹿洞膳田天植持不可且捐俸益諸生廩餼俾時講習

其中後歷曹濮兵備

江南通志靖進士今據

謹案舊志誤作嘉太學題名碑改正

馮應鳳字鳴陽浙江山陰人萬曆八年進士九年爲永

豐令永豐襟江繞湖田多水患應鳳築隄捍流皆成沃

壤及補御史按江右讞諸郡獄必務平反至今刊布爲

爰書之式歷遷太僕少卿卒

據浙江通志補

邵仲祿字孟廉四川夔州人隆慶二年進士萬厯中權舟九江汰關役之冗者盡委府佐於他所主守權金暮則儲之郡庫不以自私其妻亦甘貧紡績時以爲難

安志

謹案謝志列九江府今移於此

江以東字貞白南直隸全椒人隆慶二年進士由南京考功郎中升江西提學副使操持方正人不敢干以私

校士至南贛當路者稍欲撓之竟拂衣歸

萬厯南昌府志

張岳字汝宗浙江餘姚人嘉靖三十八年進士授行人

厯南京右僉都御史督操江疏論張居正奪情事落職

聞住居正死起故官巡撫南贛汰冗卒核浮餉奸弊無所容又鑒前政苛擾務爲簡靜百姓愛之官至刑部右

侍郎

明史贛州府志

賈待問字叔學山東東萊人隆慶二年進士以右僉都御史巡撫南贛鎮遏有方盜不入境疏通鹽法使吉民

受算於廣公私交便晉太子少保

贛州府志

朱鴻謨字文甫山東益都人隆慶五年進士授吉安府推官識鄒元標於諸生厚禮之擢南京御史以疏救言官語侵大學士張居正斥爲民居正卒起故官出按江

西奏蠲水災賦請減饒州瓷器不報又疏薦建言削籍

者忤旨奪俸歷官刑部右侍郎贈刑部尙書諡恭介

明史

白志

謝志原案豫章昔鴻謨署篆泰和嘗市米自

給嚴并里甲常供片脯升醪捲握之饋皆不得至前從躬清潔俸羨以振貧儒所入援手而盡嘗曰吾身旁儲銀至五銖輒病其大廉不嫌殆天授然也

張恆字明初南直隸嘉定人萬曆八年進士由刑部郎出爲江西副使有折獄才事至片言立決大學士某與

民爭湖利恆奪以與民舉江右循吏第一

江南通志

容若玉字崑石南直隸懷甯人萬厯二年進士厯官嶺

北道岑賊嘯聚廣中和平諸境若玉攝布政使事假節

鉞兼程而進出賊不意軍於大龍扼要害檄嶺北兵截

賊歸路遣諜者火其巢一戰禽之人皆服其雄略

江南通志

沈九疇字箕仲一字東霍浙江鄞縣人萬厯五年進士

由郎中遷江西按察司副使提督學校先爲約凡行部

卽直指檄不得入至吉安直指以故人子置書檄中九

疇爲弗聞也者俟榜發然後入之由是干謁路絕遷左

參政累轉江西左布政使有中使來司權先檄諸長吏

迎敕九疇宣言曰敕諭中使非敕守土吏也例不當迎

且吾儕獨無敕乎誰其迎者中使爲氣沮一日中使移

書自稱予九疇叱其使曰往惟高皇帝起吳時曾稱予
若中貴人何敢爾中使大懼立造謝初中使之來紿言
江右歲可得十四萬金既至靡所措頻詣九疇問計九
疇屢折之最後踈踏泣下九疇以五萬許之復請益於
按院增萬金江西稅得不濫科者九疇之力也據兩浙名賢錄

朱彝尊靜志居詩話鄧縣志補

陳有年字登之浙江餘姚人嘉靖四十一年進士萬厯
中以右僉都御史巡撫江西尙方所需陶器多奇巧難
成後有詔許量減旣而如故有年引詔旨請不從內閣
申時行等固爭乃免十之三南畿浙江大侵詔禁鄰境
閉糴商舟皆集江西徽人尤眾而江西亦歲儉羣乞有
年禁遏有年疏陳濟急六事中請稍弛前禁令江西民

得自救南京御史方萬山劾有年違詔竊怒奪職歸再
起爲吏部尙書卒諡恭介有年在江西以水災疏請蠲
振者再奏行條鞭徵銀法以蘇積困及弛南昌府長河
魚課以予貧民人皆德之

明史
豫章書

陸萬垓字天溥浙江平湖人隆慶二年進士以右僉都
御史巡撫江西寬易不苛曲盡經畫勸行社倉法儲穀
若干萬石歲侵發振全活甚多濱江圩壤輒令有司築
之汲汲勤民至忘寢食以瘁卒官贈右副都御史士民

立祠江上

萬曆南昌府
志安志

夏良心字宗堯南直隸廣德人隆慶五年進士授刑部
主事累升江西左布政使精覈吏事州縣轉賦輒至輒
輸下牒若流水吏胥不能名一錢擢巡撫江西右副都

御史方嚴飭下察見隱微雖銷帟之姦莫匿小大畏法
四境肅然節公帑建義倉儲穀三萬餘石荒政賴焉稅
使至良心力與爭權額差減又奏停采廣信封禁山及
景德鎮陶器但用土青俱得請卒於官贈兵部尙書賜

祠額曰褒德

萬曆南
昌府志

王敬民字用司河南西華籍應天府句容人隆慶五年
進士萬曆十七年以僉都御史撫贛講武詰奸振興文
教郡城故多火災敬民治救火具開井於南街以備之
十八年大疫置局授醫全活尤無算

贛州
府志

朱廷益字汝虞浙江嘉善人萬曆五年進士十七年以
僉事督江西學政屏絕干謁益王餽古琴受而置諸學
宮曰以彰賢王崇儒雅意翼日王以妃弟屬廷益謝曰

校閱時何由私識執法所以敬王也發卷置劣等擢南

通政司參議

據浙江通志補

黃汝亨字貞父浙江仁和人萬歷二十六年進士授進賢知縣清賦簡訟教士卹郵修隄橋建社學民甚德之入爲郎中出督江西學屏絕請託衡文一以先民爲法臨川陳際泰東鄉艾南英皆其首錄士也升分守湖西參議以強項罷歸所著有寓林集

安志

謝杰字漢甫福建長樂人萬歷二年進士除行人累遷順天府尹以右副都御史巡撫南贛屬吏被薦者以賄謝杰曰賄而後薦干戈之盜薦而後賄衣冠之盜人以爲名言進南京刑部右侍郎尋擢戶部尙書

明史謝杰原案贛

州府志云杰雅負經濟於戎務民事虛懷博訪具得原委立營柵檣推稅革計利減和糴平反冤獄裔治江湖

積寇又從士民請建玉虹塔於下河雙江皆美政也

錢槓字岳陽浙江山陰人萬厯八年進士知袁州府豈弟廉易以憂歸服除累遷提督江西學政公明著稱嘗行部袁州建袁高士祠爲文以厲多士至今誦學政者必首推之

安志

李汝華字茂夫河南睢州人萬厯八年進士以右僉都御史巡撫南贛稅使四出議括關津諸稅輸內府汝華以稅本餉軍力爭止之旣而詔四方稅務盡領於有司以其半輸稅監進內府半輸戶部獨江西潘相勒有司悉由己輸汝華極論相違詔帝竟如相議汝華在贛十四年威惠甚著建贛甯二學纂輿圖要覽刊布醫藥之書天啟元年以戶部尙書加太子太保致仕卒諡恭敏

明史 贛
州府志

方大美字黃中南直隸桐城人萬曆十四年進士以御史巡按江西時稅監橫甚大美力與之抗整飭吏治尤好獎拔人才所培植者甚眾

江南通志

吳達可字安節南直隸宜興人萬曆五年進士歷知上高豐城諸縣並有聲選授御史出按江西稅使潘相毆折輔國將軍謀圮肢竝繫宗人宗達誣以劫課劾上饒知縣李鴻主使帝切責謀圮等奪鴻官達可言宗人無故受刑又重以詰責將使天潢人人自危鴻無辜不當黜願亟正相罪復鴻官弗聽相又請開廣信銅塘山采大木鑿泰和武姥山石膏達可復極諫不可閣臣力爭之乃寢累官通政使卒贈右副都御史

明史

余焯字羲河浙江遂安人萬厯十四年進士由大理評事出知南康府厯升江西參政募兵給屯革饒州南康諸郡糧弊築九江壩葺都昌城復安義堰所至皆以實

政名

據浙江通志補

查允元字虞皋浙江海甯人萬厯十四年進士厯禮部郎中出爲江西提學僉事再任江西參政持守廉介終始弗移衡文不爽毫髮所拔士皆蠟上第以去練子甯八世孫綺自閩之長樂還允元訪得之留居峽江給衣巾奉子甯祀以學租百石畀之練氏遂有後

練公遺事

丁繼嗣字國雲一字禹門浙江鄞縣人萬厯十一年進士爲人坦厚精於吏事厯官江西副使分巡湖西阻中官潘相采礦西昌之議二十九年升參政分守南贛所

按治無遺姦爲民興利除害敏決無滯城廨學宮經始
修飾規制皆出其裁畫累官副都御史巡撫福建府志

鄧縣志

龔道立字應身南直隸武進人萬曆十四年進士由兵
部郎出知建甯府歷江西嶺北道參政粵東歲侵民逾
嶺者數千人邏者以寇報巡撫皇遣議遣兵道立曰此
饑民來就食耳請身往諭設法振濟士民德之尋升湖
廣按察使致仕府志

陸長庚字元白浙江平湖人萬曆八年進士累官湖廣
按察使三十年進江西右布政使轉左布政使請捐南
昌府門稅改折京絹值宗祿不給宗屬千餘人譟於衢
長庚出存積羨金十三萬補之三十六年大水請弛長

河魚禁以蘇民困在任七年羨餘悉封識儲庫升應天

府尹終南京通政使

嘉興府志

王佐字翼卿一字泰蒙浙江鄞縣人萬曆十一年進士二十一年任南昌知府用法嚴吏皆側足立無敢出聲諸廢畢舉奏治行第一升督學副使參政按察使右布政使聲名俱如治郡時四十一年巡撫江西民間其來皆歡舞於道境內多盜爲申保甲更戍守寇暴衰息稅監潘相橫甚獨稍憚佐佐以利害開諭之因使自上請減稅五千商困少蘇李道稅湖口尤不法佐按治其黨奏革奄稅歸有司凡在豫章二十餘年深仁厚澤諸所建議足爲後世法擢工部侍郎去士民爲之立祠

安志

上卷舊傳

陳一元字泰始福建侯官人萬厯二十九年進士巡按
江西歲侵民饑奏留本年稅銀發振檄所司告糴吳楚
轉輸於民全活者無算

福建通志

李長庚字孟白湖廣麻城人萬厯二十三年進士授戶
部主事厯江西左右布政所在勵清操除解費察吏弊
尊禮儒士遺愛在民立祠滕王閣之右

明史
安志

李開芳福建永春人萬厯進士任江西按察使礦使人
豫章權稅首及廣信其爪牙橫甚大吏莫敢誰何上饒
知縣李鴻獨捕繫數人杖殺之中使怒飛章以聞撫臣
某慮禍及將繼劾鴻開芳曰果爾海內視公爲何如人
請劾某而置上饒令撫臣慚而止開芳禮賢恤土工文
辭善八分書江西諸名勝往往有其題字

舊志

黃承元字履常浙江秀水人萬曆十四年進士官湖西參政閒歲移粵西湖西民爭額留之乃復因任承元爲政以卹民隱寬民力爲先稅監潘相與竊監陳奉比誅求甚厲承元移書千百言止之事獲寢永新萬安諸材官因緣奸利糜糈累漕或貸富人錢虛募營卒以應承元悉釐革袁屯益漕自出官鑄定爲營制居三載晉中

州右轄累官福建巡撫贈工部右侍郎

吉安府志

舒其志湖廣廣濟人萬曆二十三年進士累官江西按察使攝饒州兼署九江淮王有世子十三齡王惑寵倡欲以其子易之王之左右班校皆巨盜出沒彭蠡間白晝攫人金帛其志廉得之託疾絕請謁止留干振四人司局鑰之事羣不逞皆舉酒賀夜半其志出袖中紙署

賊名令前四人者分捕其黨置之法隨出謁王王色沮
乃出世子宮中而殺其僞子及倡湖口稅監李道自置
參隨百餘人皆殘賊亡賴上下羅織蓮舟漁艇罕得免
者其志乃製輕舟如飛鷁狀自鄱湖度湖口密令將備
丙夜聚蘆葦然炬大呼從烈燄中出不意縛其渠用前
舟飛送九江獄餘眾驚懼奔躍入水中道聞之宛轉求
解其志故爲計曰眾怒難犯若留此恐終不免惟束裝
宵行耳道果逡巡去於是凡助道爲虐者皆麗於法人
咸快之

安志

葛寅亮浙江錢塘人萬厯二十九年進士備兵九江銳
意興革先是湖口稅監李道氣燄甚張當道莫敢問寅
亮至卽榜示諸奸弊與榷稅條目檄道奉行如約且言

將以某日巡江檄湖口守備練兵以俟道聞之懼不敢出寅亮因執其鋪戶某等置諸法漸及參隨胥吏道望門請託寅亮弗爲動卒罪首惡盡汰諸冗役選謹愿者百餘人爲二番腰繫以牌月赴道驗受聽約束民於是始不罹其害癸丑歲饑出三府公費數百金并貸關使者千金告糴湖襄以平價糴諸民民賴以濟創建陽明書院選諸生肄業其中置社學十二所以教貧民子弟之不能延師者開南薰東作二門建開西城蓄水以制火患諸所造作甚多移疾去官行李一肩而已

安志

洪瞻祖字貽孫浙江仁和人鐘曾孫萬曆二十六年進士選翰林院庶吉士以右副都御史巡撫南贛時閩廣流寇劫掠州邑官軍多失利瞻祖檄諸郡合勦親歷

瘴冒矢石不數月平賊渠了獲總等一千餘人毀賊巢三十餘奪還男婦牛馬器械無算以疾乞歸囊橐蕭然有撫虔奏疏一卷

贛州府志

汪泗論字自魯南直隸休甯人萬曆三十八年進士天啟中以御史巡按江西敦重持大體奸宄肅然宗人祿不給疏以橋稅贖鍰存留接濟歷太僕寺少卿

據明史
革漢儒

補傳

胡士相字端甫浙江平湖人萬曆三十二年進士授弋陽知縣陳利病十事弋故多盜士相嚴保甲法盜風頓息升刑部主事歷官江西參政分守湖西奸民請開礦部檄至覆寢其事眾議建魏忠賢祠士相持不可請蠲袁州積逋建義倉興學校優旨賜金增秩升廣西按察

使丁母憂歸卒

臨江崇祀錄
嘉興府志

陸夢龍字君啟浙江會稽人萬曆三十八年進士授刑部主事由郎中歷江西參議進諸生講藝陽明書院士風翕然承平久人不知兵夢龍募健兒五百教之技擊號曰標兵九江之有標兵自夢龍始魏忠賢竊政撫按建祠媚之夢龍亟遣使劾其名後以右參政死固原之難贈太僕寺卿

白志
江府志 九

解學龍字石帆南直隸興化人萬曆四十一年進士崇禎五年以右僉都御史巡撫江西疏言臣所部州縣七十八坐逋賦降罰者至九十人由數歲之賦責於一歲數人之逋責於一人故終無及額之日請別新舊酌多寡立帶徵之法可之四方盜賊蠭起江西獨無重兵學

龍以爲言詔增置千人討平都昌萍鄉諸盜封山妖賊
張普微等擁眾橫行合閭兵擊之賊遂殄滅十二年冬

擢南京兵部右侍郎

明史
白志

范復粹山東黃縣人萬厯四十七年進士崇禎時以御
史巡按江西請禁有司害民六事時大釐郵傳積弊減
削過甚反累民復粹極陳不便丁艱歸後官吏部尙書

建極殿大學士致仕

據明史程
國祥傳補

侯峒曾字豫瞻南直隸嘉定人天啟五年進士崇禎中
由稽勳郎中遷江西提學參議給事中耿始然督賦至
他監司以屬禮見峒曾獨與抗禮益王勢方熾歲試黜
兩宗生王怒使人誚讓峒曾不爲動江右人頌其公明

謂數十年所未有

明史
白志

林日瑞字浴元福建詔安人萬曆四十四年進士歷官

江西右參政憂歸服闋起故官分守湖東屬縣鉛山界

閩妖人聚山中謀不軌圍鉛山日瑞擊敗之搗其巢累

官右僉都御史巡撫甘肅流賊薄甘州死之

明史

周應期字際五浙江永嘉人萬曆四十七年進士崇禎

初備兵九江馭吏率屬動循軌度公庭湛然如水人不

敢干以私在任五年兵民舉安井市無擾一時稱善治

焉

九江府志

王之良字虞卿陝西華陰人天啟五年進士巡撫南贛

時西北寇盜蜂起之良蒐卒勵兵大修戰具得火器新

法仿爲之開陞築城以資守禦暇輒振興文學相度賀

蘭山形勢徙建學宮又從贛令陳履忠請建廉泉書院

捐俸置學田數百畝尋升兵部侍郎

贛州府志

蔡懋德字惟立南直隸崑山人萬厯四十七年進士官江西提學副使以王守仁拔本塞源諭示諸生著管見臆說數千言發明良知之學士多興起累官至山西巡撫闖賊攻城力戰死之謚忠襄

白志

吳麟瑞字思王一字在賢浙江海鹽人萬厯四十七年

進士爲湖東巡道

謹案嘉興府志麟瑞官九江參政四流寇擾江楚駐節袁州則非爲湖東

巡道與安志所述不同附注俟考

初下車謁羅明德遂於明德祠講學

諸生講論有佳者必拜手受之崇禎六年濤涌寇峯渡溺死者三十餘人麟瑞惻然捐金建橋其上顏曰萬年與太平橋相望焉升分守湖西參政流寇躡三楚湖西之袁州鄰楚新被寇麟瑞乃移駐袁州嚴戰守之備以

故終任無患遷按察使尤以澄清爲己任貪吏雖才必黜民有獄訟必親鞫不輕委之守令轉右布政請告歸甲申之難感憤成疾卒

安志 浙江通志

陳士奇字平人福建漳浦人天啟五年進士崇禎十三年母憂闋起贛州兵備參議奸民爭地搆訟者十年士奇立剖平之爲人清介絕俗禁屬員餽遺嘗微服覘守令庭鞠得失他日相見語之曰某事當一郡畏之若神轉四川學道擢巡撫張獻忠陷重慶被縛罵賊死全家皆殉焉

國朝乾隆四十一年追諡忠烈

贛州府志

王相說南直隸泰州人天啟二年進士初任袁州府推官明於聽斷案牘無留內擢監察御史推補江西督糧

參政崇禎末流寇益熾轉餉給軍水陸無匱左良玉兵南下恣淫掠相說委曲開諭怵以禍福左兵遂稍戢漕

運獲安

袁州府志

周燦字光甫南直隸吳江人南贛巡撫用五世孫也登崇禎四年進士巡按江西時張獻忠已破長沙羽書旁午巡撫郭都賢杜門束手燦躬率士卒按行險隘疏陳兵餉事宜以楚疆決裂請敕行開諸臣併力夾擊以保江南又言商民交敝請南漕二糧各折半以惠民止九江分關以卹商旅惠王準駐廣信燦上言廣信瘠壤嚴疆江右諸藩星列碁布何堪益此情詞尤懇切云

吳江顧樵

撰傳

葉士彥南直隸巢縣人崇禎十年進士十六年分巡九

江至則嚴備諸險要總兵左良玉久留潯陽鄉民苦之士彥與之宴陳說大義忠憤激揚良玉感愧立起還武昌士民醴酒相慶時有屯防遊擊胡以甯者倚東廠太監王德化勢肆橫於九江假防禦流賊名招無賴悍丁爲兵陰縱之劫掠江上又時時侵擾民居人情恟懼士彥條列其狀請於督師袁繼咸逐之去在任撫綏瘡痍軫恤疾苦甚至及歸民皆巷哭

九江府志

彭期生字觀我

一作字觀民

浙江海鹽人萬曆四十四年進

士崇禎十六年張獻忠寇江西期生由兵部郎中授湖西道分巡僉事駐吉安既至率士民城守以死自誓

大兵徧吉安期生力竭走贛州乞援留同守贛偕楊廷麟招降張安等就加太常寺卿兼嶺北道兵備城破賦

絕命詞冠帶白縊死有弱水山人詩集

明史楊廷麟傳

舊志原案朱彝尊詩話云期生與楊萬諸公力保孤城死之日守備楊大器潛收其尸瘞萬安縣百家邨仲子孫貼訪其遺骸不得久之鄉人胡樞知萬安縣事一夕夢先生語曰遺骸在縣境君能歸之故鄉幸甚會大器之友曾亮景亦以狀白樞樞資遣之歸葬海鹽說者比之思歸之溫序焉

夏萬亨字元禮南直隸崑山人起家舉人福王時使迎

太后因升江西布政使言者以爲驟乃改僉事分巡南

昌瑞州尋升按察使署布政使事南都潰萬亨奉母至

撫州聞南昌已陷入保建昌與王養正同被執死之妻

顧子婦陸及孫一女孫一俱先赴井死僕婢隨死者復

十餘人

明史南
疆釋史

王養正字聖功南直隸湖州人崇禎元年進士授海鹽

知縣累遷南康知府

南疆釋史云嘗
知南康九江

計殲巨寇鄧毛溪

熊高一方賴之福王時進副使分巡建昌時事已不可
爲養正加意拊循士民賴以安堵南都覆大兵下江
西巡撫曠昭棄南昌走列城望風潰養正乃與布政使
夏萬亨知府王域推官劉允浩南昌推官史夏隆合兵
拒守閏三月有客兵內應城卽破養正等被執械至武
昌死之其妻張氏亦絕粒九日死明史舊志
謹案舊志有張本朱純林潤三傳本與純治績不關江西潤傳與明史多有不合且已見撫州府今茲從刪